

قصة قصيرة

## المراية

أبونا تادرس يعقوب ملطي ✍

يا ترى إيه اللي ممكن يخليني مبسوط؟  
هل لو ركزت بس في إني أنجح و أكون غني و عندي حاجات كتير ... هل ساعتها هاكون مبسوط؟



St-Takla.org

المصدر: [كتاب 'قصص قصيرة' - أبونا تادرس يعقوب ملطي](#)   
فيه واحد كان غني و ناجح و عنده فلوس كتير و حاجات كتير ... لكن في يوم قعد يفكر مع نفسه: 

أنا مش حاسس إني مبسوط ... رغم كل الغنى اللي عندي ده, حاسس إن فيه حاجة مهمة نقصاني ... حاجة جوايا ماقدرش أشتريها و مش عارف أحصل عليها ... و مش عارف حتى إيه هي؟

صاحبنا ده ماستسلمش لزعله ... قابل راجل حكيم عشان يسأله و يفهم منه ... و اتكلموا مع بعض



## الحكيم

تعالى نبص من الشباك ... قل لي شايف إيه؟



## الغني

شايف السما زرقا و جميلة ... و شايف الشارع فيه ناس كتير



## الحكيم

طيب بص في المراية الحلوة اللي عندك دي ... قل لي شايف إيه؟



## الغني

شايف صورتي بس



## الحكيم

هي دي المشكلة ... لو بصيت في القزاز بتاع الشباك ... قزاز شفاف رخيص ... هاتشوف السما ... الحاجات الحلوة اللي ربنا خلقها ... و إخوانك  
لو بصيت في المراية الفضة بتاعتك, مش هاتشوف غير نفسك بس ... و بالتالي هايكون كل تفكيرك في نفسك بس,  
مش في ربنا ولا في إخوانك ... و هاتحس إنك دائماً مسجون و مش قادر تشوف حاجة تانية  
لو عايز تنبسط بجد ... ماتهتمش بنفسك بس ... بُص و فُكر في ربنا و في إخوانك